



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA**

- Komisija za vanjsku i trgovinsku politiku –

Broj: 02/2-50-1-9-16-3/04

Sarajevo, 26. 03. 2004. godine

Z A P I S N I K

**sa 16. sjednice Komisije za vanjsku i trgovinsku politiku
Doma naroda Parlamentarne skupštine BiH
održane 25. 03. 2004. godine**

Šesnaestu sjednicu Komisije za vanjsku i trgovinsku politiku Doma naroda Parlamentarne skupštine Bosne i Hercegovine sazvaio je predsjedavajući Komisije Hasan Čengić.

Sjednici su prisustvovali svi članovi Komisije: Hasan Čengić, Anto Spajić, Vinko Radovanović, Osman Brka, Velimir Jukić i Nade Radović, kao i Nevenka Savić, sekretar Komisije.

Osim navedenih, sjednici su prisustvovali iz Ministarstva vanjskih poslova: Ibrahim Đikić, pomoćnik ministra, Ana Trišić, pomoćnik ministra; iz Ministarstva sigurnosti Vidimir Banduka; i iz Ministarstva vanjske trgovine i ekonomskih odnosa Hamdo Tinjak, sekretar Ministarstva.

Sjednicom je predsjedavao predsjedavajući Komisije Hasan Čengić. Nakon što je konstatirao da postoji kvorum, predsjedavajući Komisije je predložio slijedeći

DNEVNI RED

1. Usvajanje Zapisnika sa 15. sjednice Komisije;
2. Informacija Ministarstva vanjske trgovine i ekonomskih odnosa o multilateralnim i bilateralnim pregovorima koji su u toku i o efektima primjene

bilateralnih ugovora o slobodnoj trgovini sa zemljama jugoistočne Evrope koji su na snazi;

3. Informacija Ministarstva vanjskih poslova o bilateralnim odnosima BiH;
4. Usvajanje Zaključaka proizašlih iz diskusija povodom razmatranja “Mogućnosti proizvodnje mlijeka u Bosni i Hercegovini i problema u vezi sa poticajima i uvozno-izvoznim režimom”;
5. Informacija Ministarstva sigurnosti o prilogu TV “BALLARO”;
6. Izvještaj o posjeti Monitoring tima Vijeća Evrope Bosni i Hercegovini i sastanak sa rukovodstvom Parlamentarne skupštine BiH i parlamentarnom delegacijom BiH u Parlamentarnoj skupštini Vijeća Evrope;
7. Izvještaj o posjeti dr Mladena Ivanića, ministra vanjskih poslova BiH Ukrajini – informacija Ministarstva vanjskih poslova,
8. Tekuća pitanja.

Dnevni red je jednoglasno usvojen.

Ad. 1. Usvajanje Zapisnika sa 15. sjednice Komisije

Zapisnik sa 15. sjednice Komisije je jednoglasno usvojen.

Ad. 2. Informacija Ministarstva vanjske trgovine i ekonomskih odnosa o multilateralnim i bilateralnim pregovorima koji su u toku i o efektima primjene bilateralnih ugovora o slobodnoj trgovini sa zemljama jugoistočne Evrope koji su na snazi

i

Ad. 3. Informacija Ministarstva vanjskih poslova o bilateralnim odnosima BiH

U uvodnom izlaganju govorili su predstavnici ministarstava koja su pripremila informacije. G. Tinjak je ukratko prezentirao sadržaj informacije Ministarstva vanjske trgovine i ekonomskih odnosa. On je rekao da se informacija sastoji iz tri dijela: u prvom dijelu, koji se odnosi na multilateralne pregovore, akcentat je stavljen na očekivano pristupanje Bosne i Hercegovine Svjetskoj trgovinskoj organizaciji do kraja ove godine. U drugom dijelu informacije, koji obuhvata bilateralne pregovore, uglavnom su obrađeni sporazumi koji se odnose na unapređenje i zaštitu investicija i slobodnu trgovinu. Treći dio informacije daje podatke o efektima primjene ugovora o slobodnoj trgovini sa zemljama iz Regiona: Slovenijom, Hrvatskom, Srbijom i Crnom Gorom i Makedonijom.

G. Đikić je u uvodnom izlaganju detaljno izložio proceduru potpisivanja međunarodnih ugovora prema Zakonu, i posebno ulogu Ministarstva vanjskih poslova u toj proceduri. U diskusiji u kojoj su učestvovali svi članovi Komisije i predstavnici ministarstava bilo je govora o: iniciranju potpisivanja ugovora, poziciji Bosne i Hercegovine u pregovorima, praćenju procesa pregovaranja, stručnoj analizi pozitivnih i negativnih posljedica primjene sporazuma po interese, naročito ekonomske, u Bosni i Hercegovini.

Na kraju diskusije, članovi Komisije jednoglasno su usvojili Zaključke koji će biti upućeni Ministarstvu vanjskih poslova i Ministarstvu vanjske trgovine i ekonomskih odnosa, kao i drugim nadležnim institucijama po potrebi od kojih se traži da za narednu sjednicu Komisije pripreme:

- Informaciju o procesu pregovaranja sa Svjetskom trgovinskom organizacijom sa preciznom analizom pozitivnih i negativnih aspekata pristupanja, za privredu Bosne i Hercegovine, kao i posljedice eventualnog nepristupanja;
- Informaciju o posljedicama priključenja 10 novih zemalja Evropskoj uniji 1. maja 2004. godine, koja će obuhvatiti pozitivne i negativne efekte za bh privredu i mjere koje će biti preduzete za ublažavanje eventualnih negativnih efekata,
- Informaciju koja će sadržavati prijedlog mjera i aktivnosti koje će se preduzeti u ovoj godini na otklanjanju negativnih efekata sporazuma o slobodnoj trgovini koje je BiH potpisala sa Slovenijom, Hrvatskom i Srbijom i Crnom Gorom.

Članovi Komisije predložili su da se na nekoj od narednih sjednica razgovara o investiranju u BiH, CARDS programu i proizvodnim mogućnostima bh privrede. Za tu svrhu zaključeno je da se od Ministarstva vanjske trgovine i ekonomskih odnosa zatraži informacija o proizvodnim mogućnostima bh privrede, tzv. "privredna karta".

Ad. 4. Usvajanje Zaključaka proizašlih iz diskusija povodom razmatranja "Mogućnosti proizvodnje mlijeka u Bosni i Hercegovini i problema u vezi sa poticajima i uvozno-izvoznim režimom"

Predsjedavajući, g. Čengiđ, rekao je da su Zaključci u odnosu na prvi prijedlog značajno reducirani, da su rokovi produženi i da odražavaju realno stanje. U diskusiji su učestvovali članovi Komisije Osman Brka, Vinko Radovanović i Nade Radović.

Na kraju diskusije, članovi Komisije su sa 5 glasova "za" i jednim "protiv" (g. Brka) usvojili sljedeće Zaključke koje upućuju Kolegiju Domu naroda na razmatranje:

Z A K L J U Č C I

Polazeći od ovlaštenja Komisije i nadležnosti Doma naroda Parlamentarne skupštine Bosne i Hercegovine, programskih opredjeljenja državnih institucija Bosne i Hercegovine, programa OHR i programa drugih institucija za tekuću godinu i period od četiri godine s

namjerom uspostavljanja samoodržive privrede, zapošljavanja, smanjenja uvoza i povećanja izvoza, priprema za članstvo u WTO, EU i obaveza prema bilateralnim sporazumima, osiguravanja održivog povratka i povećanja zdravstvene i ekološke zaštite, a ocjenjujući sadašnje stanje i razvoj proizvodnje i prerade mlijeka u Bosni i Hercegovini pozitivnim, ali i opterećenim nizom sistemskih i drugih nedostataka i problema, koji se trebaju i mogu riješiti, nakon diskusije kojoj su prisustvovali i u njoj učestvovati: svi članovi Komisije; predstavnici Vijeća ministara BiH: gospodin Enver Muratović, šef Odsjeka za vanjskotrgovinsku politiku, Čedo Ljuboja, šef odsjeka za carinsku tarifu, Mario Perc, stručni saradnik iz Ministarstva vanjske trgovine i ekonomskih odnosa i dr Nihad Fejzić, zamjenik direktora Ureda za veterinarstvo; predstavnik Vlade Federacije BiH: gospodin Milan Vasić - savjetnik, Federalno ministarstvo poljoprivrede, predstavnici proizvođača i prerađivača: Gligorić Ljuban, savjetnik u "Mlijeko produktu" iz Kozarske Dubice; Marjan Vučak, predsjednik Uprave "Meggle" d.o.o. Bihać; Željko Marijan, direktor "Lura" mljekare Livno i Nurudin Peštalić, vlasnik "INMER" mljekare Gradačac.

Komisija predlaže Domu naroda, a on Parlamentarnoj Skupštini BiH i Vijeću ministara slijedeće:

- 1) Izraditi **državnu strategiju** poljoprivrednog razvoja i posebnu strategiju razvoja mljekara (koja će omogućiti osposobljavanje domaćeg sektora za uvjete poslovanja nakon ulaska BiH u WTO, prema bilateralnim sporazumima – Hrvatska, SCG, Slovenija, ...- i punopravnog članstva u EU).

NOSILAC: VIJEĆE MINISTARA BiH, VLADE OBA ENTITETA
ROK: ŠEST MJESECI

- 2) Donijeti **državni zakon** o poljoprivredi

NOSIOCI: VIJEĆE MINISTARA BiH i PARLAMENTARNA SKUPŠTINA BiH
ROK: PET MJESECI

- 3) Donijeti **sistemske mjere** za zaštitu domaćih proizvođača na nivou države vodeći računa o međunarodnim obavezama i principima WTO.

NOSILAC: VIJEĆE MINISTARA BiH, VLADE OBA ENTITETA
ROK: TRI MJESECA I KONTINUIRANO

- 4) Pokrenuti **Projekat uvođenja standarda EU u BiH** do 2006. godine u organizaciji proizvodnje, prikupljanja i praćenja kvaliteta mlijeka i mliječnih proizvoda (koji će definirati organizaciju, metode i dinamiku uvođenja, koristiti i predlagati nova znanja, tehnologije i tehnike, uspostaviti nezavisne laboratorije i institute – barem po jedan na nivou države i entiteta – za kontrolu ne samo masnoće, nego i: proteina, prisustvo bakterija, somatskih ćelija, antibiotika; te carinskoj politici, subvencioniranim robama, kontingentima-vrsta i količina. Organiziranje proizvođača mlijeka u odgovarajuće zadruge i udruženja, zajedničke nabavke, usluge, plasman...)

NOSIOCI: VIJEĆE MINISTARA BiH i VLADE OBA ENTITETA
ROK: ŠEST MJESECI

- 5) Uspostaviti **odjel za poljoprivredu u Ministarstvu za vanjsku trgovinu i ekonomske odnose BiH** (radi koordiniranja aktivnosti iz nadležnosti VIJEĆA MINISTARA BiH i VLADA OBA ENTITETA, i drugih nadležnih institucija).

NOSILAC: VIJEĆE MINISTARA BiH
ROK: ČETIRI MJESECA

- 6) Donijeti na nivou države i entiteta:

a) **Zakon o stočarstvu i podzakonske akte:**

- i. Pravilnik o izvozu mlijeka i mliječnih proizvoda (definirati uvjete, kriterije i standarde za izvoz i povlastice)
- ii. Pravilnik o standardima kvaliteta u proizvodnji i prometu mlijeka i mliječnih proizvoda
- iii. Pravilnik o standardima kvaliteta priplodnih goveda i uslovima klanja i prometa priplodne stoke
- iv. Utvrditi otkupnu cijenu i uvjete preuzimanja mlijeka

NOSIOCI: VIJEĆE MINISTARA BiH i VLADE OBA ENTITETA
ROK: ŠEST MJESECI

- b) **Izvršiti regionalizaciju proizvodnje** – gdje šta bolje uspijeva – državni projekt, koristeći najnovija znanja i dosadašnja i nova istraživanja.

NOSIOCI: VIJEĆE MINISTARA BiH i VLADE OBA ENTITETA;
ROK: DVIJE GODINE

- c) **Uspostaviti centre za uzgoj priplodnih goveda**, koristeći nauku apliciranu na domaćem okruženju, i organizirati **tržište priplodne stoke** (stručna pomoć, sufinansiranje poticaja...)

NOSIOCI: VIJEĆE MINISTARA BiH I VLADE OBA ENTITETA;
ROK: JEDNA GODINA

- d) **Uspostaviti centre za obuku** – korištenje savremenih metoda i praćenje razvoja – farmera, zadružnika, proizvođača, državne uprave, menadžmenta.. u proizvodnji i preradi mlijeka.

NOSIOCI: VIJEĆE MINISTARA BiH i NAUČNE I STRUČNE USTANOVE
ROK: JEDNA GODINA, REDOVNO

- 7) Osigurati **finansijske podsticaje i povoljno kreditiranje** investicija u proizvodnji i preradi mlijeka (budžetski i drugi podsticaji za mlijeko, priplodne junice,

subvencije na kamate za investicijske kredite, povlastice na cijene struje, vode, građevinskog zemljišta, sredstva iz razvojnih fondova, krediti kroz konzorcij banaka za strateške i izvozne projekte prerađivačima i proizvođačima...)

NOSIOCI: VIJEĆE MINISTARA BiH i VLADE OBA ENTITETA; VLADE KANTONA; FONDOVI I KOMERCIJALNE BANKE

ROK: DVA MJESECA, I KONTINUIRANO

- 8) **Sinhronizirati srednjoročne programe razvoja infrastrukture:** putevi, struja, voda, telefon,... sa strategijom poljoprivrednog razvoja na nivou države, entiteta, kantona i općina;

NOSIOCI: VIJEĆE MINISTARA BiH i VLADE OBA ENTITETA; VLADE KANTONA, IZVRŠNA VLAST OPĆINA

ROK: REDOVNO

- 9) Sufinansiranje projekta **ukrupnjavanja u proizvodnji i preradi mlijeka** kod domaćih proizvođača; te poticanje osposobljavanja menadžmenta kod prerađivača (samo tako domaća proizvodnja se može nositi sa sposobnom i snažnom konkurencijom stranih proizvođača);

NOSIOCI: VIJEĆE MINISTARA BiH, VLADE OBA ENTITETA, PRIVREDNE KOMORE, BIZNISMENI

ROK: DO KRAJA 2004. I KONTINUIRANO

- 10) Pokrenuti **Projekat organski proizvedene hrane** prema standardima EU, na nivou države, koji treba biti naglašeno izvoznog karaktera.

NOSIOCI: VIJEĆE MINISTARA BiH i VLADE OBA ENTITETA

ROK: JEDNA GODINA I KONTINUIRANO

- 11) Pokrenuti **Projekat domaćih «brand-mark»**, autohtonih bosanskohercegovačkih proizvoda, naglašeno izvoznog karaktera, po kojima će se Bosna i Hercegovina u buduće prepoznavati na svjetskom tržištu mliječnih proizvoda (salamurni sirevi, dimljeni sirevi, kajmak...)

NOSIOCI: VIJEĆE MINISTARA BiH i VLADE OBA ENTITETA

ROK: JEDNA GODINA I KONTINUIRANO

- 12) Inicirati **marketing saradnju proizvođača i prerađivača mlijeka** i finansijsku podršku za nastup na domaćem tržištu prodaje, prezentacije, sajmovi, izložbe, takmičenja, nastupi u medijima...

Realizirati marketinški **projekat: «Kupujmo domaće»**, kroz osiguranje 500.000 KM u 2004. godini za izradu spotova, đinglova, plakata... i prezentaciju na domaćim elektronskim i drugim medijima, sa naglaskom na manjim proizvođačima i proizvođačima sa većinskim domaćim kapitalom.

NOSIOCI: VIJEĆE MINISTARA BiH i VLADE OBA ENTITETA
ROK: TRI MJESECA

- 13) Zatražiti od Kolegija Doma naroda Parlamentarne skupštine BiH da ove **zaključke uvrsti u dnevni red** naredne sjednice Doma kako bi se o njima Dom izjasnio, a potom ih prosljediti Vijeću ministara BiH na dalje postupanje.

NOSIOCI: PREDSEDavajući KOMISIJE I KOMISIJA
ROK: ODMAH

Ad. 5. Informacija Ministarstva sigurnosti o prilogu TV "BALLARO"

U diskusiji povodom ove tačke Dnevnog reda učestvovali su članovi Komisije Nade Radović, Vinko Radovanović, Osman Brka, Velimir Jukić i Hasan Čengić i predstavnik Ministarstva vanjskih poslova g. Đikić.

Članovi Komisije su jednoglasno usvojili sljedeće Zaključke koje upućuju Kolegiju Doma naroda i Ministarstvu vanjskih poslova:

1. Komisija podržava principijelnu politiku Bosne i Hercegovine u vezi sa osudom terorizma, i borbe protiv terorizma. U tom smislu ona će nastaviti pružati punu podršku tim aktivnostima u parlamentarnoj skupštini Bosne i Hercegovine.
2. Komisija smatra neprihvatljivim paušalne ocjene iznijete u emisiji "Ballaro" o terorizmu u Bosni i Hercegovini pod nazivom "Mudžahedini u Bosni". Očekujemo da odnosi Bosne i Hercegovine i Italije, koji su dobri, budu interpretirani na pravi način.
3. Komisija daje podršku aktivnostima koje je preduzelo Ministarstvo vanjskih poslova, Ambasada BiH u Rimu, Konzulat BiH u Milanu i drugi nadležni organi Bosne i Hercegovine u vezi objektivnog informiranja o ovom slučaju, pitanju odnosa BiH prema terorizmu i nastojanjima BiH u borbi protiv terorizma, organizovanog kriminala, trgovine ljudima, šverca drogom...
4. Komisija očekuje da će nakon usvajanja Informacije MVP BiH na Predsjedništvu BiH, a koristeći i stav iznijet od strane komandanta SFOR-a u BiH, američkog generala Virgil L. Packett-a na sastanku o terorizmu ovog mjeseca u Sarajevu biti poslana precizna informacija i instrukcija svim DKP BiH u svijetu. Također, ova Komisija očekuje da će MVP BiH redovno analitički pratiti sva događanja, medijske i diplomatske istupe i izvore u vezi tretiranja države BiH u kontekstu razmatranja pitanja međunarodnog terorizma s posebnim osvrtom na utjecaj tog pitanja na vanjskopolitički imidž i poziciju Bosne i Hercegovine.

5. Komisija traži od nadležnih organa, a posebno od Vijeća ministara BiH i Ministarstva sigurnosti BiH da predvode aktivnosti na rješavanju “neriješenih pitanja i problema vezanih za praćenje ove problematike na nivou države” i uklanjanju “određenih problema koji se mogu dovesti u kontekst terorističkih aktivnosti”.
6. Komisija traži da se što prije uspostave strukture sigurnosti na državnom nivou za koje su već donijeti zakoni, a čije aktiviranje će omogućiti i uspješnu borbu protiv terorizma, te povećanje sigurnosti kako u zemlji tako i u okruženju.

Ad. 6. Izvještaj o posjeti Monitoring tima Vijeća Evrope Bosni i Hercegovini i sastanak sa rukovodstvom Parlamentarne skupštine BiH i parlamentarnom delegacijom BiH u Parlamentarnoj skupštini Vijeća Evrope

Članovi Komisije primili su Izvještaj k znanju.

Ad. 7. Izvještaj o posjeti dr Mladena Ivanića, ministra vanjskih poslova BiH Ukrajini – informacija Ministarstva vanjskih poslova

Članovi Komisije primili su Izvještaj k znanju i jednoglasno usvojili sljedeće Zaključke:

- Traži se od Ministarstva vanjskih poslova BiH da se ubrzaju aktivnosti na ekonomskoj i političkoj saradnji sa Ukrajinom.
- Komisija predlže Kolegiju Doma naroda da zajedno sa Kolegijem Predstavničkog doma ubrza saradnju sa Parlamentom Ukrajine.
- Komisija predlže Kolegiju Doma naroda da zajedno sa Kolegijem Predstavničkog doma uputi poziv predsjedniku Parlamenta Ukrajine da posjeti Parlamentarnu skupštinu Bosne i Hercegovine.

Ad. 8. Tekuća pitanja

Diskusija nije vođena.

Predsjedavajući Komisije

Hasan Čengić